



Misingi ya Unabii

SABATO MCHANA

Somo la Juma Hili: Isa. 6:6–8, Mwa. 3:21–24, Eze. 1:4–14, Rev. 4:1–11, Hes. 2:3–25, Isa. 14:12–14.

Fungu la Kukariri: “Kisha nikaisikia sauti ya Bwana, akisema, Nimtume nani, naye ni nani atakayekwenda kwa ajili yetu? Ndipo niliposema, Mimi hapa, nitume mimi” (Isaya 6:8).

Haki ya Mungu ya kutawala ulimwengu imejengwa juu Yake nafasi kama Mwumbaji wa vitu vyote (*Ufu. 4:11*) na pia juu ya tabia Yake. Ni katika kugundua tabia ya Mungu ya haki ndipo tunaanza kuelewa ni kwa namna gani na kwa nini wanadamu wenye dhambi wanapungukiwa na utukufu wa Mungu (*Rum. 3:23*).

Juma hili, tunaingia ndani zaidi katika maono ya chumba cha enzi na kufikiria jinsi jamii ya wanadamu inavyohusiana na Mungu mtakatifu na jinsi kafara ya Kristo inavyoturejesha na kutuleta karibu na kiti cha enzi. Mungu anapanga kuturejesha, si tu kama mtu mmoja mmoja bali pia kama jamii, ili kwa mara nyingine tena tudhihirishe utukufu Wake kwa Uumbaji wote. Kwa kuchunguza katika sehemu nyingine yote ya Biblia, tunawezakupata vidokezo muhimu vinavyotusaidia kuelewa na kuanza kuthamini wito mkuu ambao Mungu ametupa, jamii ya watu wenye dhambi waliosamehewa na kukombolewa.

Uasi wa wanadamu, hatimaye na milele, utakomeshwa. Na, zaidi ya hayo, tabia ya Mungu ya upendo, tabia Yake ya kujikana nafsi na kujitoa kafara, itang’aa zaidi kuliko ilivyokuwa katika mpango Wake wa asili kwa wanadamu. Ingawa Mungu hakukusudia wanadamu waanguke, kwa njia ya msalaba, tabia ya Mungu ya upendo imedhihirishwa kwa namna isiyo kifani.

**Jifunze somo la juma hili kwa maandalizi ya Sabato ya Mei 17.*

Mimi Hapa, Nitume Mimi

Miaka mingi iliyopita, kanisa liliamua kukarabati sehemu ya jengo lililo chini ya ardhi lililopitwa na wakati ili kujenga ukumbi mpya kwa ajili ya ushirika. Mojawapo ya mambo ya kwanza waliyofanya ni kufunga taa mpya, wakiadini kwamba wangepanya sehemu hiyo ionekane kuwa yenye kupendeza zaidi. Mara tu zilipowekwa, hata hivyo, sehemu hiyo ilionekana kuwa mbaya zaidi, kwa sababu mwanga angavu una namna ya kufunua mapungufu.

Maono ya Isaya mazuri mno ya kiti cha enzi cha Mungu yalimfanya ajue kwa uchungu udhaifu wake. “‘Ole wangu,’” aliomboleza, “‘kwa maana nimepotea! Kwa sababu mimi ni mtu mwenye midomo michafu, nami ninakaa kati ya watu wenye midomo michafu; na macho yangu yamemwona Mfalme, Bwana wa majeshi’” (*Isa. 6:5*). Tungejisikia vivyo hivyo ikiwa tungeongozwa kwa ghafla kwenda mbele za Bwana. Nuru inang’aa kiasi cha kutosha kuondoa udhuru wetu wote. Katika kuwepo kwa Mungu, tunahisi kwamba tumepotea. Isaya alikuwa katika mastaajabu ya maisha yote.

Soma Isaya 6:6–8. Isaya alijua kwamba dhambi inamaanisha kwamba ‘tumepotea. Mshahara wa dhambi ni mauti. Lakini badala ya kutuacha kwenye matokeo ya dhambi, Mungu wa upendo hutuvuta karibu zaidi. Kukutana huku kulikuwa na matokeo gani na kwa nini ni muhimu?

Isaya alisafishwa dhambi yake wakati serafi alipochukua kaa la moto juu ya madhabahu na kugusa kinywa chake kwa hilo. Huenda hii ilikuwa madhabahu ya kufukizia uvumba, ambapo maombezi yalifanywa na kwa niaba ya watu wa Mungu (*tazama Ufu. 8:3, 4*). Dhambi zake zilisamehewa na sasa alionekana kufaa kusimama mbele za Mungu—lakini zaidi ya hayo, aliagizwa pia kumwakilisha Mungu kwa ulimwengu.

Cha kuvutia zaidi, neno “serafi” linamaanisha “anayewaka.” Tazama maelezo ya Yesu kuhusu huduma ya Yohana Mbatizaji katika *Yohana 5:35*—“‘Yeye alikuwa taa iwakayo na kung’aa, nanyi mlipenda kuishangilia nuru yake kwa muda.’” Ingawa, bila shaka, Yohana mwenyewe alikuwa mwenye dhambi aliyehitaji neema na wokovu, huduma yake ilielekeza kwa Yule ambaye peke Yake angeweza kuleta neema na wokovu.

Yesu alikuja kama udhihirisho kamili wa utukufu wa Baba—Naye Mungu alimtuma nabii, mwenye dhambi, aliyefanya kazi kama ya mmoja wa maserafi wa mbinguni.

Baada tu ya Isaya kujua kwamba dhambi yake ilikuwa imesafishwa, ndipo aliposema, Mimi hapa, nitume mimi. Ni kwa namna gani kila mmoja wetu, dhambi zetu zikiwa zimesafishwa kwa damu ya Yesu, anaweza kuitikia kama Isaya alivyofanya hapa?

Makerubi Wawili

Mara tu wazazi wetu wa kwanza walipofukuzwa bustanini, Mungu alitoa tumaini la Masihi (*Mwanzo 3:15*). Kisha akaweka ishara yenye nguvu katika malango ya Edeni: makerubi wawili wenye kung'aa sana kati yao. Tunapaswa kutambua kwamba tukio hili linafanana sana kwa karibu na sanduku la agano, ishara ya kiti cha enzi cha Mungu (*Kut. 25:18*).

Soma Mwanzo 3:21–24. Makerubi walipewa kazi gani—na kwa nini?

Wakati kwa hakika makerubi walipewa jukumu la kuwazuia wenye dhambi wasiufikie mti wa uzima (*Mwa. 3:22*), walikuwa pia ishara ya tumaini, ya ahadi, kwamba siku moja wanadamu wangerudishwa katika paradiso. “Bustani ya Edeni iliendelea kuwepo duniani kwa muda mrefu baada ya mwanadamu kutengwa kutoka katika njia zake za kupendeza. Jamii ya wanadamu walioanguka dhambini waliruhusiwa kwa muda mrefu kuyatazama makazi yao waliyoishi hali wakiwa hawana hatia, kuingia kwao humo kulizuliwa tu na malaika walinzi. Katika lango la Paradiso lililolindwa na makerubi, utukufu wa Mungu ulidhihirishwa. Mahali hapa alikuja Adamu na wanawe ili kumwabudu Mungu. Hapa walifanya upya nadhiri zao za utii wa sheria ile ambayo kwa kuiasi walifukuzwa Edeni. . . . Lakini katika wakati ule wa urejeshwaji wa mwishoi, patakapokuwepo “mbingu mpya na nchi mpya” (*Ufunuo 21:1*), Edeni itarejeshwa ikiwa imepambwa kwa utukufu mwingi zaidi kuliko ilivyokuwa hapo mwanzo.”— Ellen G. White, *Wazee na Manabii. Sehemu ya Kwanza*, uk. 54, 55.

Maneno katika Mwanzo 3:24 pia yanavutia: Biblia inaonesha kwamba Mungu “aliweka” makerubi upande wa mashariki wa bustani ya Edeni, na neno la asili la Kiebrania lililotumika ni shakan, neno mzizi la “hema” takatifu (*tazama Kut. 25:9, Hes. 3:26*), ambapo kuwepo kwa Mungu kulikaa kati ya watu Wake. Ingawa neno la jumla Shekina, linalomaanisha kuwepo kwa Mungu, halipo katika Biblia, lenyewe pia, linanatokana na neno hili ambalo mara nyingi hutafsiriwa “hema.” Tafsiri sisi ya shakan inaweza kusomeka, “Mungu aliweka hema ya makerubi upande wa mashariki wa Bustani ya Edeni.”

Katika Biblia, makerubi wanahusishwa na kuwepo kwa Mungu (*tazama 1 Nya. 13:6, Zab. 80:1 na Isa. 37:16*), hasa na kiti Chake cha enzi, ambacho ni mahali ambapo jina Lake linatangazwa. Hatupaswi kushindwa kuona kwamba wazee 24 wanaotumika mbele ya kiti cha enzi cha Mungu katika *Ufunuo 4 na 5* wanaimba sifa Zake na kutangaza haki Yake ya kutawala kama Yeye aliyeviumba vitu vyote (*Ufu. 4:11*). Hili linaweza kutusaidia kuelewa mandhari ya chumba cha enzi na wajibu/nafasi yetu kama watenda dhambi waliosamehewa katika uhusiano na Muumba wetu.

Kama Kaa la Moto Uwakao

Makerubi, ama kama viumbe hai (Eze. 10:8) au ishara zao za dhahabu (Kut. 25:18), wanaonekana kote katika Agano la Kale. Mara nyingi wanaelezwa wakiwa wamesimama karibu sana na kiti cha enzi cha Mungu, wakiangaza utukufu Wake kwa ulimwengu. Makerubi pia wametariziwa katika pazia mbele ya Patakatifu pa Patakatifu (Kut. 26:1). Katika kitabu cha Zaburi, uweza mkuu wa Mungu juu ya uumbaji unaelezwa kishairi kama Mungu akibebwa juu ya upepo na makerubi (Zab. 18:10). Mungu aliamuru kwamba juu ya sanduku la agano wawekwe makerubi wawili wa dhahabu tupu na mabawa yao yakinyoosha kuelekeana (Kut. 25:18–20).

Soma Ezekieli 1:4–14. Unaona ufanani gani kati ya kifungu hiki na matukio yanayoelezwa katika Isaya 6:1–6 na Ufunuo 4:1–11?

Ezekieli anaoneshwa udhihirisho wa ajabu wa uweza wa Mungu. Ni tukio la kutatanisha kwa kuanzia, kulinganisha na hali mbaya ambayo watu wa Mungu walijikuta wakiishi nayo wakati huo: wateule hawako katika nchi ya ahadi bali katika utumwa wa Babeli. Ezekieli anapochunguza tukio lililowekwa mbele yake, anatazama juu na kuona kiti cha enzi cha Mungu juu kabisa.

Angalia ufanani muhimu na maono mengine ya “kiti cha enzi.” Viumbe hai ambao Ezekieli anawashuhudia wanazo nyuso sawa na za viumbe hai katika maono ya Yohana: simba, tai, ng’ombe na mwanadamu.

Viumbe hao wa ajabu wenye nyuso nne hawakutajwa bayana katika maelezo ya awali ya Ezekieli; lakini baadaye, katika tukio lingine la chumba cha enzi (tazama Eze. 10:1–21), wanaitwa “makerubi,” na pia tunapata kaa la moto kutoka katika maono ya Isaya ya maserafi. Nyuso zoa zinafanana na viumbe hai wanaotajwa katika maono ya Yohana.

Wakati wowote tunapoona kiti cha enzi cha Mungu—iwe katika mfano wa sanduku la agano, ambalo lilitumika kama mahali pa Mungu pa kukutania na Musa (Kut. 25:22), au maono ya kustaajabisha ya manabii—daima makerubi wapo. Wanahusiana kwa karibu na kiti cha enzi cha Mungu. Viumbe wote wa Mungu vilikusudiwa kuakisi utukufu Wake—iwe tunazungumza juu ya jamii ya wanadamu walioumbwa kwa mfano Wake au malaika wanaohudumu kuzunguka kiti Chake cha enzi chenye utukufu.

Mtakatifu, mtakatifu, mtakatifu ni Bwana Mungu Mwenyezi. Unajilinganishaje dhidi ya utakatifu ambao Ezekieli anashuhudia hapa? Jibu lako linakuambia nini kuhusu hitaji lako la injili?

Mungu Katikati ya Watu Wake

Kufuatia uongozi wa kuwepo kwa Mungu katika wingu, Waisraeli walisimama katika safari yao ya kwenda katika Nchi ya Ahadi na kusimamisha hema takatifu, kisha makabila yalipiga kambi zao kuizunguka—makabila matatu kila upande. Kuwepo kwa Mungu kulishuka mpaka ndani ya Patakatifu pa Patakatifu na kukaa katikati ya watu Wake.

Kulikuwa na kabila moja kuu katika kila moja ya pande nne za maskani. Kwa mujibu wa Hesabu 2, haya makabila manne makuu yalikuwa ni akina nani?

Hes.2:3 (Mashariki): _____

Hes.2:10 (Kusini): _____

Hes.2:18 (Magharibi): _____

Hes.2:25 (Kaskazini): _____

Ona kwamba kila kabila kuu lilipeperusha “beramu” yake lenyewe, au bendera maalum, ili kuonesha walikuwa nani. Wakati ambapo Maandiko hayasemi wazi kile kilichokuwa kwenye kila bendera, kuna mapokeo ya kupendeza—kutokana na sifa za kila kabila zinazoelezewa katika Mwanzo 49 na Kumbukumbu la Torati 33—ambazo huweka mojawapo ya nyuso nne kwa kila moja ya pande nne za dira. “Kwa mujibu wa mapokeo ya marabi, bendera ya Yuda ilikuwa na uso wa simba, ya Reubeni ilikuwa na sura ya mtu au kichwa cha mtu, na ya Efraimu uso wa ng’ombe, na ya Dani uso wa tai; kwa namna ambayo wale viumbe wenye uhai wanne waliunganishwa katika sura za makerubi walioelezwa na Ezekieli waliwakilishwa katika bendera hizi nne.”—Carl Friedrich Keil na Franz Delitzsch, *Commentary on the Old Testament*, vol. 3. 1 (Peabody, MA: Hendrickson, 2011), uk. 660.

Inawezekana kuyapatia mapokeo umuhimu kupita kiasi, bila shaka, lakini bado inafurahisha kulinganisha mapokeo haya ya kale na maelezo ya Biblia kuhusu Yerusalemu Mpya. Mfano wa kuvutia unatokea: kuna milango inayowakilisha makabila matatu matatu kwa pande zote nne za mji (*Ufu. 21:12, 13*).

Maelezo juu ya kambi ya Israeli na Yerusalemu Mpya yanasisitiza ukweli mmoja muhimu: Mungu anakusudia kuwavuta wanadamu karibu na kiti Chake cha enzi. Kitabu cha Ufunuo kinatufundisha kwamba “Bwana Mungu Mwenyezi na Mwana-Kondoo ndio hekalu lake” (*Ufu. 21:22*).

Bila shaka, hatuishi katika kambi ya Israeli. Lakini ni kwa njia zipi, katika maisha yetu wenyewe sasa, tunaweza kusogea karibu katika kuwepo kwa Mungu?

Anguko la Lusifa

Inaonekana kutoeleweka kwamba Lusifa aliwahi kushikilia nafasi ya kerubi afunikaye, akiwa na nafasi ya juu karibu na kiti cha enzi cha Mungu. Kwa hakika kuweco kwake kungesaidia kufunua utukufu wa Mungu kwa ulimwengu. Badala yake, alianza kufikiria juu utukufu wake mwenyewe, si utukufu wa Mwumbaji wake; au, kwa usahihi zaidi, alianza kufikiria kwamba hakuwa anapewa heshima aliyostahili.

Soma Ezeieli 28:11–17 na Isaya 14:12–14. Nini kilisababisha anguko la Lusifa? Linganisha vifungu hivi na Ufunuo 14:1–12. Tofauti kati ya anguko la Lusifa na nafasi ya juu ya mwanadamu katika Kristo inakuweshaje kuelewa kile kinachotokea katika Ufunuo 14?

Angalia jinsi Lusifa alivyoondolewa kutoka katika mlima mtakatifu, wakati waliokombolewa wanasimama juu ya Mlima Sayuni pamoja na Mwana-Kondoo wa Mungu. Inasemekana kwamba Lusifa alikuwa katika bustani ya Edeni; jamii ya wanadamu pia iliwahi kuwa huko, lakini tofauti na hatima ya Shetani, wanadamu watarejeshwa katika paradiso kwa njia ya Kristo. (*Tazama Ufu. 22:1–3.*)

Katika muktadha huu, nukuu ifuatayo kutoka kwa Ellen G. White inaelimisha sana: “Mbingu itajawa shangwe, kwa maana nafasi zilizo wazi mbinguni kutokana na anguko la Shetani na malaika zake zitajazwa na waliokombolewa na Bwana.”—*The Advent Review and Sabbath Herald*, Mei 29, 1900.

Na wako huko, mbinguni, kwa sababu ya injili pekee. Kwa hakika, mada ya injili, ya ukombozi, inapatikana kwa jinsi iliyo dhahiri katika chumba cha enzi katika Ufunuo 4 na 5. Kwa mfano, malaika wanapaza sauti: “ “Wastahili wewe kukitwaa hicho kitabu na kuzifungua muhuri zake; kwa kuwa ulichinjwa, ukamnunulia Mungu kwa damu yako watu wa kila kabila na lugha na jamaa na taifa” ’ ” (*Ufu. 5:9*). Ni taswira iliyoje ya injili, kifo cha Yesu kwa ajili ya ukombozi wa wanadamu!

Ona, pia, jinsi lugha inavyoakisi ujumbe wa malaika wa kwanza, ambapo tumeitwa kuhubiri “injili ya milele . . . kwa hao wakao juu ya nchi, kwa kila taifa, na kabila, na lugha, na jamaa” (*Ufu. 14:6*). Ni udhihirisho dhahiri kiasi gani wa utimilifu wa kile Kristo alichowafanyia ulimwengu. Hakuna mwanadamu katika historia yote ya dunia ambaye Kristo hajamfia. Wanahitaji tu kutambua hilo na kuchagua kukubali.

Wajibu wetu ni upi kama kanisa na kama mtu mmoja mmoja, katika kuwajulisha watu kuhusu kile Kristo alichowafanyia?

Jifunze Zaidi: Soma Ellen G. White, “Mwisho wa Pambano,” uk. 545-557, katika Pambano Kuu.

Shetani, ambaye hapo awali alikuwa kerubi afunikaye, alitaka kuharibu imani katika kiti cha enzi cha Mungu. Mungu amewaruhusu malaika walioanguka waendeleo na uasi wao ili kuuonesha ulimwengu kina cha uovu unaotokana na kujikweza—na wakati Shetani aliweza kuwadanganya wanadamu wajiunge na vita vyake dhidi ya Mungu, Kristo alimshinda kabisa msalabani, akiwapatia wanadamu mahali ambapo malaika walioanguka walisimama hapo awali. Wenye dhambi, katika Kristo, wanageuka hadharani dhidi ya madai ya Lusifa. Tukio la mwisho, kwa namna fulani, ni ufunuo mkubwa zaidi wa wema na upendo wa Mungu kuliko ulivyokuwa kabla ya anguko la Lusifa. Ingawa Mungu hakuamua kwamba uovu uwepo na ni msiba wenye matokeo ya milele, mwisho wa yote wema na upendo wa Mungu vitafunuliwa kwa njia ambazo vinginevyo visingeweza kufunuliwa.

Kristo “anawaangalia waliokombolewa, wakiwa wameumbwa upya katika sura Yake, kila moyo ukiwa na chapa kamilifu ya sura ya Mungu, kila uso ukiakisi mfano wa Mfalme wao. Anaona ndani yao matokeo ya kazi ya nafsi Yake na anaridhika. Ndipo, kwa sauti inayosikika kwa wote waliokusanyika, wenye haki na waovu, anatangaza: ‘Tazama thamani ya damu Yangu! Kwa ajili ya hawa niliteseka, kwa ajili ya hawa nilikufa, ili waweze kuishi mbele Yangu katika zama zote milele na milele.’ Na wimbo wa sifa unapanda juu kutoka kwa wale waliova mavazi meupe waliokizunguka kiti cha enzi: ‘Astahili Mwana-Kondoo aliyechinjwa, kuupokea uweza na utajiri na hekima na nguvu na heshima na utukufu na baraka’ *Ufunuo 5:12*.”—Ellen G. White, *Pambano Kuu*, uk. 552, 553.

Maswali ya Kujadili:

1 Hebu fikiria umesimama mbele za Mungu ukiwa na kila dosari, kila kasoro ya tabia, kila tendo baya, kila wazo baya, kila nia mbaya vikiwa vimefunuliwa kikamilifu mbele Zake! Ungestahili nini kwa uhalali na kwa haki? Basi, tumaini lako pekee ni lipi? Kwa nini ni lazima tuvikwe “haki ya Mungu iliyo kwa njia ya imani katika Yesu Kristo, kwa wote waaminio” (Rum. 3:22) sasa, na katika hukumu, tunapoihitaji zaidi? Kwa ufupi, kwa nini tunahitaji injili?

2 Yohana Mbatizaji, kama tulivyoona, alikuwa katika nafasi ya serafi-taa iwakayo na kuang’aa. (Tazama Yohana 5:35.) Bila shaka, alikuwa mtangulizi wa Kristo, akitangaza kutokea kwa mara ya kwanza kwa Masihi. Watu wa Mungu wa siku za mwisho wanatimizaje wajibu kama huo wa kiunabii?